

Andrag vun de SPD-Frakschoon un Bündnis 90/Die Grünen**Biraat Platt mutt wietergahn**

De Regionalspraak Plattdüütsch, de hier in'n Noorden tohuus is, mutt vun Generatschoon to Generatschoon wiedergeven warrn. Kloor is, de Minschen, de vundaag Platt snackt, schafft dat nich alleen, de Spraak in de Tokunft to hölpen.

In den Artikel 7 Absatz 4 vun de Europäasche Charta vun de Regionaal- oder Minderheitensspraken steiht binnen, dat Gremien insett warrn schüllt, de de Behörden bi allens hölpen köönt, wat mit de lütten Spraken to doon hett. Över de Tiet weg mutt dat mööglich ween, över dat to snacken, wat mit Nedderdüütsch tohuus hangt, un Ideen intobringen, woans de Sprakencharta ümsett warrn kann.

Plattdüütsch hett in Bremen un umto över Johrhunnerten en grote Rull speelt. Dat dat ok in tokamen Tieden noch so is, dorför hett de Bremsche Börgerschaft (Landdag) in de verleden 18. Regierungstiet en Biraat Plattdüütsch insett, so as de Europäasche Sprakencharta dat vorgiff. Nu mutt dat wietergahn mit de Arbeit vun den Biraat. Inricht warrn is he bi den Präsident vun de Bremsche Börgerschaft. So stellt Bremen rut: Dat is heel un deel wichtig, dat de Plichten ut de Europäasche Charta vun de Regionaal- oder Minderheitensspraken ümsett warrt – un dat gellt för all Behörden un Parteien.

De Börgerschaft (Landdag) schall besluten:

1. Dat geiht wieter mit den Biraat Plattdüütsch, de in de 18. Regierungstiet insett warrn is. De Biraat blifft anbunnen bi den Präsident vun de Bremsche Börgerschaft. In den Biraat schüllt sitten:
 - a) Lüüd vun de Frakschoonen ut de Börgerschaft (Landdag),
 - b) een vun dat Institut för nedderdüütsche Spraak,
 - c) een vun de nedderdüütschen Dackorganisatschoonen in Bremen un Bremerhaven,
 - d) Lüüd, de mit Nedderdüütsch in School, Wetenschap, Medien, Theater, Kark to doon hebbt,
 - e) Lüüd ut de Ressorts, de mit de Sprakencharta to doon hebbt.
2. De Biraat Platt schall desülvigen Opgaven hebben, de he in de 18. Regierungstiet harr. Bavento schall he öffentlich över dat snacken, wat dat Land Bremen in den Lännerbericht to de Sprakencharta schrifft.

Sükrü Senkal, Elombo Bolayela,
Björn Tschöpe un de Frakschoon vun de SPD

Dr. Kirsten Kappert-Gonther, Björn Fecker,
Dr. Maike Schaefer un de Frakschoon Bündnis 90/Die Grünen